



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Dili
05 Dezembru 2014

Tribunál Distrital Dili adia julgamentu ba kazu infantisídiu tanba juis titular hetan demisaun husi Rezolusaun Parlamentu no Governu

Iha 04 Dezembru 2014, Tribunál Distritál Dili adia julgamentu ba krime infantisidiu ne'ebé involve arguida NF, iha loron 04 Marsu 2014, iha Distritu Aileu.

Antes ne'e iha kazu refere involve kompozisaun koletivu ne'ebé entre juiz koletivu ne'e nain ida hosi juis internasional ne'ebé afetadu hosi Rezolusaun PN no Governu ne'ebé intruduz iha dia 24 no 30 Outobru 2014, fulan liu ba kotuk.

Aleinde juis, prokurador ne'ebé representa Estadu iha kazu ne'e mós prokurador internasional ne'ebé fila ona ba nia nasaun atu kumpri ordem Rezolusaun Governu ne'ebé husu atu imediatamente husik hela Timor iha oras 48 nia laran.

“JSMP preokupa teb-tebes tanba kazu importante ne'ebé involve fetu no labarik tenke adia tanba konsekuensia hosi rezolusaun hirak ne'e. Rezolusaun ne'e afeita teb-tebes ema nia direitu atu asesu ba justisa ne'ebe lalais, baratu, justu no sein adiamentu ne'e la neseariu,” dehan Diretor Ezekutivu JSMP, Luis de Oliveira Sampaio.

JSMP observa katak kazu sira ne'ebé ezije kompozisaun koletivu, maioria involve fetu no labarik ne'ebé vítima hosi kazu violénsia seksuál no violénsia hasoru labarik, hanesan inestu no krime infatisídiu, hanesan kazu ne'ebé akontese iha Tribunál Distritál Suai, iha 4 Novembru 2014.

Foin lalais iha 27 Novembru 2014, Tribunál Distrital Baucau mós tenke adia julgamentu ba kazu violasaun seksuál ho agravasaun (inestu) tanba la prienxe rekejitu kompozisaun tribunál koletivu.

JSMP fiar katak kazu hirak ne'ebé hetan adiamentu, tribunál sira tenke halo fali rejulgamentu total, tanba la iha mekanismu transferensia ba prosesu kazu ida-idak depoisde rezolusaun hirak intruduz.

Wainhira la iha mekanismu no polítika apropriadu ruma atu hadia situasuan ne'e, JSMP fiar katak sei kazu barak mak kontinua adia sein razaun ne'ebé justu no nesesariu. Situasaun ne'e prejudika teb-tebes ema nia direitu ba justisa.

JSMP kontinua enkoraza Parlamentu Nasionál no Governu atu hadi'a situasaun ne'e hodi garante justisa ba povu, liu-liu komidade kbi'it la'ek ne'ebé buka justisa.

Atu hetan informasaun liu tan, favór ida kontaktu:

Luis de Oliveira Sampaio

Diretór Ezekutivu JSMP

E-mail: luis@jsmp.minihub.org

info@jsmp.minihub.org

Telefone: +670 3323883 | +67077295795

Website: www.jsmp.tl

Facebook: www.facebook.com/timorleste.jsmp

Twitter: @JSMPTl